



Tasiilap eqqaani piniarnermut nakkutilliisoqartitsisoqalernissaa suliareqqullugu Naalackersuisut peqquneqarnissaanik Inatsisartut aalajangiiffigisassaattut siunnersuut.

(Siumup Inatsisartuni ilaasortaaitai)

(siullermeerneqarnera)

Siumup Inatsisartuni ilaasortaaitaanut qujavugut uuminnga siunnersuuteqarnerannut.

Demokraatit Tasiilami piniarnermut nakkutilliisoqartariaqarneranik tunngavilersuutitut paasinnipput. Tasiilami suliffissaaleqineq qaffasissorujussuuvoq, taassumalu appartinneqarnissaanut alloriaataasinnaasutut isigineqarsinnaavoq.

Taamatut oqareerluta, Naalackersuisut isumaqataanginnerminnut aningaasatigut kingunissaanik tunngavilersuuteqarnerat paasisinnaalluarparput. Demokraatitut pingaartuuvoq, ingerlatsinermut aningaasartuutit qaffassannginnissaat, pisortat ingerlataat pisortallu allaffeqarfiat qaffakkiartunnginniassammat.

Nunatsinni nakkutilliisut qassiuneri pillugit Siumut naalackersuisullu assigiinngitsunik oqariartornerat takusinnaagakku isumaqarpunga misissuisoqartariaqartoq ilaatigut nakkutilliisoqarnerup nunamut tulluurtumik siammarneqarsinnaanera eqqarsaatigalugu, aammalu aningaasat qassit piniarnermut nakkutilliisunut illikartinneqarsimanersut paaserusunnarpoq.

Demokraatit piumasaraat, Aalisarnermut, Piniarnermut Nunalerinermullu ataatsimiititaliap misissussagaa, ullumikkut aningaasaliissutaasartut iluanni Tasiilami piniarnermut nakkutilliisoqalersinnaanersoq.

Paasinnilluta siunnersuut Aalisarnermut, Piniarnermut Nunalerinermullu ataatsimiititaliamut suliareqqitassanngorlugu innersuupparput.